

Santalices: “Ante a barbarie e na defensa dos dereitos humanos non hai nin pode haber reservas”

- **O Parlamento de Galicia acolleu un acto institucional de homenaxe ás vítimas do Holocausto e ás vítimas galegas dos campos nazis**
- **Alumnado co IES Xosé Neira Vilas de Perillo (Oleiros) deu lectura aos nomes dos galegos obrigados a subir nos trens da morte**
- **O presidente do Parlamento recorda a todas as vítimas do Holocausto e tamén aos exiliados españois que ao final da guerra civil foron confinados en campos de refuxiados no sur de Francia**
- **Recoñecemento tamén para o labor de persoas como diplomático Sanz Briz, para as irmáns Touza e para todas as persoas que axudaron aos perseguidos polos nazis**

Santiago, 19 de febreiro de 2018.- O Parlamento de Galicia acolleu esta tarde un acto institucional organizado co gallo da recente celebración do Día Internacional en Conmemoración das Vítimas do Holocausto (27 de xaneiro) e de homenaxe ás vítimas galegas dos campos nazis.

O presidente da Cámara, Miguel Ángel Santalices Vieira, afirmou que “ante a barbarie e na defensa dos dereitos humanos; fronte aos totalitarismos –sexan do signo que sexan- e fronte á súa barbarie, non hai nin pode haber reservas entre os demócratas”.

Por iso, dixo Santalices, “celebro a reiterada unanimidade desta Cámara na condena do Holocausto, máis tamén para reclamar unha actitude inquebrantable fronte a posibles brotes de racismo, xenofobia ou discriminación baseados na orixe étnica o unas crenzas relixiosas das persoas”.

O acto comezou coa lectura dos nomes das 193 vítimas galegas dos campos nazis, persoas que foron obrigadas a subir aos trens da morte; unhas morreron nos campos de concentración, mentres que outras foron liberadas. A relación foi proporcionada pola Asociación Galega para a recuperación da Memoria Histórica e a lectura correu a cargo de alumnas e alumnos do IES Xosé Neira Vilas de Perillo (Oleiros).

No vestíbulo principal do Parlamento de Galicia, escenario do acto, colocáronse 193 rosas brancas, aprisionadas por arame de espiño e ao carón do escudo de Galicia, como símbolo do “recordo imperecedeiro das 193 vítimas galegas deportadas aos campos nazis”.

Unha Galicia liberada das ataduras da ditadura

“Sirvan estas flores –afirmou o presidente do Parlamento- para simbolizar o recoñecemento ás vítimas dos campos nazis na Galicia actual, unha Galicia democrática, dotada das súas propias institucións de autogoberno xurdidas da Constitución española e do Estatuto de Autonomía; unha Galicia que, liberada para sempre das ataduras da ditadura, acubilla o recordo destas e de todas as vítimas, co agarimo e coa dignidade que todo ser humano merece, en especial os que loitaron pola liberdade e contra o fascismo”.

“A estas vítimas galegas –continuou Santalices- rendemos tributo na sede do poder Lexislativo galego, do mesmo xeito que homenaxeamos a memoria de todos os españois que foron deportados aos campos de exterminio, e á totalidade das vítimas do Holocausto, fose cal fose a súa orixe”.

Na súa intervención, o presidente do Parlamento recordou tamén aos exiliados españois que, ao remate da guerra civil, en 1939, foron confinados en campos de concentración no sur de Francia en condicións infrahumanas.

“Rendemos tributo, ademais –engadiu o titular do Lexislativo galego-, a cantas persoas, especialmente as e os heroes anónimos, desde as súas diversas responsabilidades, foron quen de enfrontarse á maldade extrema encarnada polo nazismo”.

Referiuse a persoas como o diplomático español Ángel Sanz Briz, coñecido como *Anxo de Budapest*, que salvou da morte a arredor de 5.000 xudeus, argumentando os vínculos destes con Sefarad.

Santalices recordou tamén ás irmáns Touza –Lola, Amparo e Julia-, tamén coñecidas como as *Schlinder galegas*, que desde Ribadavia deron soporte a unha rede que conduciu a Portugal, e desde alí a América, a varios centos de xudeus que fuxían do horror nazi.

“Uns e outras, e moitos máis desde o anonimato, constitúen exemplos de heroísmo en grao extremo, persoas que asumiron riscos elevadísimos sen máis recompensa que a da súa conciencia, tratando de axudar a quen estaba sentenciado de antemán por un réxime despiadado”, concluíu Santalices.

A xuízo do presidente do Parlamento “segue sendo necesario explicar aos máis novos qué foi o Holocausto e as súas causas”, do mesmo xeito que, como pide a ONU, resulta preciso “condenar sen reservas calquera manifestación de intolerancia relixiosa, incitación, acosou ou violencia contra as persoas ou comunidades baseadas en cuestións de carácter étnico ou relixioso”.

A UE, o mellor antídoto contra o totalitarismo

Aínda así, “hai moitas e poderosas razóns para o optimismo, comezando polas ferramentas coas que a propia Europa se dotou a si mesma para evitar repetir dramas do pasado”. Para Santalices, a Unión Europea, democrática e social, malia as súas disfuncións, segue a ser o mellor antídoto contra a barbarie e contra os totalitarismos que todos rexeitamos”.

O acto celebrado esta tarde responde a unha proposta da Asociación para a Recuperación da Memoria Histórica e foi organizado logo do acordo dos catro grupos parlamentarios representados na Cámara. Durante a celebración institucional, Elías González Docampo interpretou á zanfona dúas pezas musicais: *O cego da faba* e *Negra Sombra*. O acto rematou co Himno Galego.



Saúdos, Gabinete de Comunicación do Parlamento de Galicia.